

**AGENDRE TRINITATIS**

MINGGU 09 JUNI 2024

**1. FANGOWAI BA FOGAONI**

*(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).*

- Fangowai** :  
**SA** : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.  
**SATO** : Ya'ahowu !  
**SA** : Ya faofao khömi Lowalangi...  
**SATO** : Ya fao Khöu Geheha-Nia  
**Fogaoni** :  
**SA** : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 27**

**27. YEHOWA WA' ABÖLÖGU 1**

do = f 4/4

MM = 88 - 92

1. Yehowa wa' abölögu, me Lowalangi Ia.  
No Ihonogö dödögu, ba lumö danga-Nia.  
Ha Ya' ia nisunogu götö wa' anau nosogu. Haleluya khö-Nia.
2. Yehowa wa' abölögu, me umbu wa' omasi.  
Ibe' e khögu Zangefa, Yesu si möi salahi.  
Da' ö zomuso dödögu, fa' ebua dödö-Nia, usuno Lowalangi.

**2. FANGA'ARO'Ö WA'OWULO (VOTUM)**

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):  
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

**SATO** : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gaha ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

**SA** : **Manunö** : BZ. : 452**Haleluya..... Haleluya..... Haleluya.....**

- SA** : Mangandrö ita :  
He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. **(Mudadao zato)**

**3. MANUNÖ moroi ba Mbuku Zinunö Numero 225****225. HE YA' ITA ZAMÖSANA**

do = d 3/4

MM = 69 - 76

1. He ya ' ita zamösana, böi abe ' e dödöda.  
Böi tawai aoha wanöndra, fangorifi nosoda.  
Na lö mangesa dödöda, ba horö si fahöna.  
Ba tebai manö tasöndra, lala wangorifida.
2. Imane Yesu So' aya, sangorifi ya' ita.  
Falalini gera' era, ogorofi zi sala.  
Aine khö-Gu zamösana, ba wangandrö fangefa.  
Ba Ya' odo zamè aefa, fefu ngawalö zala.

#### 4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **V Moze 17:14-20**

14. Na no öruigi danö andrö, nibe'e Lowalangi, Yehowa, khöu, na no ö'okhögö ba na no ahono ndra'ugö ba danö, ba na ömane dania: Da'ufataro khögu razo, högögu, si mane ba niha baero fefu, si tefasui ya'o,
15. ba ha nituyu Lowalangi, Yehowa, öfataro razo khöu. Iwami öfataro razo khöu; niha bö'ö, si tenga ya'ami, ba lö tola öfataro khöu.
16. Ba fa böi soya kudo ia ba böi yamu'ohe mangawuli ami ba danö Miserayi, ba wangoya'ö kudonia, me noa sa'ae iwa'ö khömi Yehowa: Böi manö mifuli ami ba da'ö!
17. Ba böi yamu'oya'ö ndrongsania, fa böi i'erogö [Yehowa], ba böi yamuhöna khönia wirö ba ana'a.
18. Ba na no dumadao dania ia ba dadaoma razo, ba yamusura khönia zambua zura goröisa andre, khö gere ono Lewi andrö ihalö;
19. ba böi aefa'aefa khönia, ba ibasobaso sagötö ya'ia, ena'ö ifamaha ia ba wangata'ufi Lowalangingia, Yehowa, ba ena'ö itöngöni daroma li goröisa andre, awö nifakhoi andrö, fefu, ba wolo'ö ya'ia,
20. fa böi fayawa ia ba niwania andrö, ba böi zi lö itörö goröisa andrö, böi yamuhole'ö ia, he ba gambölö, ba he ba gabera, ena'ö ara razo ia ba Ndraono Gizeraëli, he ya'ia, ba he ononia dania.

Simanö daroma Li Lowalangi, da tatema'ö faoma sinunö: BZ.Numero 20:1

#### BZ. No: 20. MISUNOSUNO ZO'AYA

1. Misunosuno Zo 'aya, mi bè zumange-Nia.  
Mi 'ebua 'ö döi-Nia, sotöi banua-Nia.  
Me no Ikaoni göi ami, afu mitemawa'auri, khö Yesu, Sangorifi.

#### 5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

#### Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö

### 3

fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

**SATO** : Manunö : BZ. Numero 224 : 1

## 224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

**SA** : **Turia Wangefa horö** : "Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö.

LAKHÖMI KHÖ LOWALANGI SI YAWA.....

**SATO** : Manunö:

## 450. BA FA'ATULÖ BA GULIDANÖ

1. Ba fa 'a tulö ba gulidanö ba niha ni'omasi 'ö andrö  
(mudadao zato)

### 6. FOMBASO TAROMA LI LOWALANGI FÖNA HUHUUO (AB)

: Da tafondrongo daroma Li Lowalangi, tehalö moroi ba zura **II Korindro 4:13-5:1**

**Faza 4:13-18**

13. Ba me no so khöma Geheha wamati andrö, si mane si so ba zura: "No mamati ndra'o, andrö humede ndra'o", ba mamati ndra'aga göi, ba andrö muhedega göi.
14. Me no ma'ila, si no manusugi Yesu, So'aya ya'ita, ba isusugi göi ndra'aga dania, awö Yesu, ba ifa'aso ndra'aga, awömi.
15. Börö sa ami, ba da'ö fefu, ena'ö amaedola zi tedoudou na wa'ebua dödö (Lowalangi) andrö, ba ena'ö fahöna; wangandrö saoha gölö, ena'ö ato zangandrö, ba wamolakhömi Lowalangi.
16. Andrö lö ma'ila wa'ata'u, he wa'ae tekiko mbotoma andre, ba tebohouni niha bakha, ero ma'ökhö.
17. Famakaoda andrö sa, si lö arara, si lö abölöbölö, ba i'a'asogö khöda lakhömi sebua, si lö aetu, irege fahöna;
18. me lö tefaigi zoroma andrö, ha si lö oroma. Soroma sa, ba lö arara, ba si lö oroma, ba irugi zi lö aetu.

**Faza 5:1**

1. Noa sa ma'ila, na tedudugö nahama andre, ba guli danö, ose andre, ba so khöma ni'otomosi Lowalangi, omo, si tenga nifazökhi tanga, si lö tebulö, ba zorugo.

Ya'ahowu zamondrongo taroma li Lowalangi ba same'e ba dödö.

**SA+SATO** : Yaduhu

### 8. FASÖMBATA

**SA** : Iada'e tebe'e khöda ginötö ba wolohe fasömbata khö Lowalangi. Ta'osamuzaigö wame'e, he fasömbata si föföna, ba simanö göi zi mendrua awö zi medölu, sifao fangowuloi fasombata **DPS**. Ba si föföna ua da tafondrongo Li Lowalangi me imane:

- ❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrö khö Lowalangi.

**SA** : Tafa'ema wasömbata khö Lowalangi, manunö ita moroi ba Mbuku Zinunö  
**Numero 258**

## 258. NO OYA MBUALAU KHÖGU

do = g 2/4

MM = 88 - 96

1. No oya mbuala-U khögu, ba mbotogu ba nosogu.  
Hanu-hanu, fa' aurigu, fa' abölö, okhötagu.  
No fa' omasi-U Yesu, sagötö fekoligu.
2. No aboto ba dödögu, mbuala-U ba wa' aurigu.  
Andrö tumbu ba dödögu, wame' e fasömbatagu.  
Ubè sumange-U Yesu, me no Ya' ugö gumbu.
3. Angandröwagu khö-U Yesu, böi böda danga-U yaWagu.  
A' aro' ö wamatigu, fahowu' ö wa' aurigu.  
Tema wasömbatagu, fangebua mbanua-U.
4. Ha Ya' ugö gubalogu, gofu heza döröwagu.  
Lö mofozu wa' aurigu, na lö fao Ndra' ugö khögu.  
Ululu wa' aurigu, amatöröwa-U Yesu.
5. Abölö' ö na ndra' odo, wolo' ö taromali-U.  
Ya mau lu wa' omasigu, mane fa' omasi-U khögu.  
Hagainido Eheha-U, afu anau gölögu.

*Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö ( irama lagu ).Fatua lö möi ira wolohe föna, ba imane Sangai Agendre:)*

“Da tafasao wasömbatada andre föna Lowalangi,.....Muzizio ita fefu.....  
Manunö ita moroi ba Mbuku Zinunö numero 261

## 261. YA'E ZUMANGE <sup>1</sup>

*Ira'alawe* □

1. Ya' e zumange fasömbata, ma' ohe sumange Yehowa.

*Iramatua*

- Reff* :Ma'andrö khö-U fahowu'ö zumange ni 'ohema khö-Mö
2. Ya' e zumange fasömbata mabe'e soroi ba dödöma.  
*Reff* : Ma'andrö khö-U ....
  3. Ya' e zumange fasömbata buala si'otarai Nama.  
*Reff* : Ma'andrö khö-U ....
  4. Ya' e zumange fasömbata, boto, noso, ba fa'aurima  
*Reff* : Ma'andrö khö-U ....
  5. Ya' e zumange fasömbata, lö irugi zomasi dödö-U.  
*Reff* : Ma'andrö khö-U ....
  6. Ya' e zumange fasömbata, ma'aohasi gölö Zo'aya.  
*Reff* : Ma'andrö khö-U ....

**FANGANDRÖ** : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, btm ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*)

### 8. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:  
Koor ba Vokal Group
- a. Koor Jemaat
  - b. Kegiata Komisi Perempuan (Koor/Vokal Grup)
  - c. Kegiata sektor 1 (Koor/Vokal Grup)
  - d. ....

- e. ....  
f. ....

**9. MANUNÖ  
SA**

- : Da tafa'anö dödöda wamondrongo taroma Li Lowalangi, manunö ita moroi Ba Mbuku Zinunö **numero 163**

**163. UHONOGÖ SIBAI DÖDÖGU**

1. Uhonogö sibai dödögu ba wamondrongo li Mö Yesu Mangalulu ndra'odo föna-U ba gametahö-Mö ia da 'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. Taroma li-Mö lö fa'atebulö menewi ma 'ökhö ba si 'ogötö'ö lö sa mamalö. Taroma li-Mö si möi fangabölö utema 'ö soroi ba dödö, tolo ba wolo'ö.

**10. HUHUA SEBUA  
SH**

- : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
- a. Fombaso taroma Li Lowalangi *I Samueli / 1 Samuel 8:4-11 (Tuho Migu: Yehowa Zangabölö'ö Enoni-Nia / Tuhan Menguatkan Hamba-Nya)*
- b. Fanuriaigö
- c. Nitanö ba dödö. *II Korindro/2 Korintus 4:8 (Fefu gofu heza, ba no mufalangögö ndra'aga, ba tenga sa nimama; nibusi tödö ndra'aga, ba so zui lala dödö. / Dalam segala hal kami ditindas, namun tidak terjepit; kami habis akal, namun tidak putus asa.)*
- d. Fangandrö Fanga'aro'ö huhuo

- SATO** : Manunö : BZ. Numero 154 : 1

**154. NO MAFONDRONDRONGO LIU<sup>2</sup>**

1. No mafondrongo li-U, Lowalangi So ' aya.  
Tanö ba dödöma ia, fa böi olifuga.  
Fahowu 'ö ia khöma, ena ' ö ohahau dödöma fefu.  
Heta ba dödö zi lö sökhi, ma'o ' ö niwa 'ö-U.

**11. TUHO WAMATI  
SA**

- : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

**SA+SATO**

- : ❖ Ya'o mamati khö Lowalangi Ama si lö ambö fa'abölö, somböi banua si yawa awö danö.
- ❖ Ya'o mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
- ❖ Ya'o mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

**12. ANGOMBAKHATA BA MBANUA NIHA KERISO**

13. SA : Da tafondrongo gangombakhata:.....

14. MANUNÖ  
SA : Manunö ita moroi ba Mbuku Zinunö **numero: 161 ayati 1-2**

**161. HE SO' AYA OMASIGA**

Lala : Sökhi sa Duria Yesu ( No. 88 )

do = es 4/4

MM = 88 - 96

1. He So' aya omasiga, ma ' ondrasi Ndra' ugö.  
Möiga wa-ne-ma bu - a - la, a - ma-bu ' u - la -li-Mö.
2. No humulu sa dödöma, wangalulu föna-Mö.  
No owulo ae ndra' aga, ba wangandrö ba döi-Mö.

**308. TANGA YESU NO ARO**

Lala : Masuno' ö Yehowa ( No. 3 )

do = f 3/4

MM = 96 - 104

1. Tanga Yesu no aro, lö manö Iböhölido.  
Sondrorogö ya ' odo, ena ' ö lö te ' alado.  
Lö mangiwa dödögu So ' aya zi fao khögu.
2. He abölö nudugu, ba so Keriso awögu.  
Ba sahono ndra' odo, Yesu zola'wa udugu.  
Lö Ilulu ndra' odo, femöna Ibè khögu.

15. FANGANDRÖ SALAHI + FAMATENGE + HOWUHOWU

**SH** : Muzizio ita fefu, mangandrö ita :.....(totohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

**SH + SATO** : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

**SH** : **FAMATENGE + HOWUHOWU :**  
Mi'angawuli si fao fa'ohahau dödö, ya tobali ami sura Keriso, samaduhu'ö Ya'Ia ba Lala wa'aurimi sero ma'ökhö, ba mitema (tatema) howuhowu Lowalangi :  
❖ Ya mufahowu'ö ami/ita Lowalangi, Ya murorogö ami/ita  
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda  
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

**SATO** : Manunö BZ.Numero 308 ayati 1

**308. TANGA YESU NO ARO**

Lala : Masuno' ö Yehowa ( No. 3 )

do = f 3/4

MM = 96 - 104

1. Tanga Yesu no aro, lö manö Iböhölido.  
Sondrorogö ya ' odo, ena ' ö lö te ' alado.  
Lö mangiwa dödögu So ' aya zi fao khögu.

**SH** : YA'AHOWU

**SATO** : YA'AHOWU